

Mogu li odbojkašice Slobode prvi put ove sezone pobijediti Kulu Gradačac?



Prvenstvo odbojkašica ulazi u završnicu. Nakon ligaškog dijela takmičenja počinje play-off za prvaka BiH.



Odbojkašice tuzlanske Slobode večeras dočekuju starog rivala, Kulu Gradačac. U ovoj sezoni sastali su se već tri puta, u Kupu Federacije i prvenstvu. Svaki put slavile su "kuljanke".

-Vrijeme je da ovaj put ostavimo sreću po strani i svim silama pokušamo ostvariti pobjedu. Ekipu Kule poznajemo veoma dobro, respektujemo ih kao ekipu, ali u našem Mejdanu ne damo pardona nikome. Ovim putem pozivam sve ljubitelje sporta i odbojke da nas podrže, da budu naš još jedan izvor motivacije. Podrška publike izuzetno nam je potrebna – izjavila je za Tuzla LIVE kapitenica Slobode, korektorka Elma Karabegović.



U prekid negativne serije s Kulom nada se i trener tuzlanskih "lastavica", Armin Dervišević. Podsjeća na skor u dosadašnjem toku sezone.

-U prvi meč četvrtfinala play-offa Premijer lige BiH ulazimo u potpunom sastavu. Činjenica da nemamo većih povreda igračica u toku ove sezone ono je što me najviše raduje. Igram slučajno, s Kulom Gradačac smo već odigrali tri utakmice. Dva puta smo poraženi sa 3:2, jednom s 3:0. Međutim, pokazali smo da se s njima može igrati, te uz raspoložen dan naših djevojaka možemo do pobjede na domaćem terenu. Time bismo pritisak druge utakmice prebacili na ekipu Kule. U našim međusobnim duelima nema nekih nepoznanica, tako da prije svega očekujem dobru predstavu i nadam se pobjedi naših odbojkašica – poručio je pred derbi dvije najbolje ekipe Tk trener Slobode, Armin Dervišević.

Ovo može biti posljednja ili, u povoljnijem raspletu, pretposljednja utakmica Tuzlanki na domaćem terenu ove sezone. Zato i trebamo da ih podržimo u većem broju i, ujedno, zahvalimo se za dobar plasman u sezoni. Peto mjesto u ligaškom dijelu takmičenja i plasman u play-off jedan je od najboljih svih tuzlanskih ekipa u aktuelnoj sezoni.

Susret Sloboda – Kula Gradačac igra se večeras od 19 sati. (tl – Foto: mpt)

Date: 22-03-2019